

«Spender daners publics cun precauziun»

Consequenzas da la crisa da l'euro per il Grischun

■ **(anr/fa) La tema ch'il spazi da l'euro gress dapart ed influenzass negativ-main era il Grischun n'è betg preschenta mo tar ils turisticchers. La regenza grischuna po quietar in zic.** E tge èsi, sche stadis commembers sortan da la zona da l'euro, tge consequenzas avess quai per il chantun Grischun e sia economia? s'ha dumandà *Beat Niederer* (pcd, Tschintg Vitgs). Suttascritta da 42 collegas deputadas e deputads ha el inoltrà quella dumonda a la regenza grischuna.

«Finanzas publicas saunas d'impurtanza centrala»

La regenza ha menziunà ch'ins na possia anc adina betg excluder dal tuttatfatg che la zona da l'euro giaja dapart, «era, sche la probabilitad para grazia a las mesiras da la Banca centrala europeica in pau pli pitschna che avant in pèr mais». La crisa europeica dals debits mussa a l'avis da la regenza quant impurtanta che finanzas publicas saunas sajan. En quest regard gioghia la Svizra cun il frain a l'indebitament ina rolla expemparica, ha constatà la regenza, «per evitar deficits structurals ston las expensas e las entradas chantunales vegnir mantegnidas en equilibrer a media vista.»

Cuntinuar cun la politica da finanzas chantunala

Sche la zona da l'euro gress dapart dessi ina recessiun per l'entira Uniun europeica (UE). La dumonda dals martgads impurtants per il Grischun sco p. ex. la Germania sa diminuiss considerablmain. En spezial il turissem badass quai fermamain. «Las consequenzas per l'economia publica federala ed uschia era chantunala dependan dentant fermamain dal fatg sche la Banca Naziunala po mantegnair il curs da stgomi dad 1.20 francs per l'euro.» Per las finanzas chantunales signifitgass la recessiun en l'UE ch'ins stuess far quint cun perditas considerablas tant tar il gudogn da la Banca Naziunala Svizra sco era tar las taglias federalas e chantunales. La strategia che la regenza propona per mitigiar questas eventualas consequenzas da la crisa da l'euro è da cuntinuar cun la politica da finanzas dal chantun che s'haja cumprovada, ch'ella saja da lunga durada ed haja effects anticiclics: «Sche la crisa da l'euro chaschuna efectivamain ina fasa da recessiun en Svizra stattan a disposiziun meds finansials limitads per promover la conjunctura, e quai independentamain da l'agen chapital cumprovà.» Quai ha persvas *Beat Niederer*: El saja satisfatg da la resposta da la regenza, ha'l ditg ier.